

寧波府志
(雍正)
六

寧波府志卷之三十三

寧波府知府富平曹秉仁纂修

寺觀

佛法浸盛肇自齊梁梵刹聿興繁於五季自此而後
凡通都大邑以至窮鄉僻壤莫不有精舍琳宮爲緇
黃所托處我寧郡如鄞邑之天童

章皇帝特賜御書定邑之普陀爲

聖祖仁皇帝發帑金所建造亦頒有

御書匾額俱稱異數其餘或祝釐

萬壽或古德道場凡有所考者皆不沒其蹟焉志寺觀

鄞

天寧禪寺

縣治西惠政橋北唐大中五年建始名國寧寺宋崇寧二年改崇寧萬壽政和二年改天

寧萬壽紹興七年改報恩光孝後又名天寧報恩元至元十九年燬重建至大二年又燬於倭至治元年重建明洪武二十年重建佛殿永樂五年重建山門宣德十年郡守鄭珞重建鐘樓正統六年重建藏殿十年建千佛閣景泰二年重建方丈成化元年建羅漢殿堂重修佛殿鐘樓天王殿山門國朝康熙二十三年三月燬五十八年僧明文徒實貴先造鐘樓并鑄鐘五十九年明文徒實貴重建大殿天王殿次年建羅漢堂

延慶講寺

縣治東南日湖中周廣順三年建名報恩院宋至道中改爲延慶寺勅賜南湖福地額嘉

定十三年僧以大悲像小欲廣之剖其臟得書云動此者水火爲災未幾寺燬像滅重建明洪武四年起信閣并山門後圯十二年復建成化三年建能仁堂於羅雲堂西南隙地寺爲天下講宗五山之第二山寺西北有觀堂宋元豐間建明萬曆時重修崇正七年災僧真源重建九年僧成德建彌陀大殿國朝順治間成德之孫海容建大悲殿鐘樓康熙七年鐘樓圯十一年海容孫照生重建

萬壽禪寺

縣治南大梁街唐咸通十三年建賜額惠燈

和八年改廣慧建炎嘉定累燬累建紹定元年賜改今額元至元十九年燬至大二年又燬復建明洪武

三十年殿宇皆圯永樂二年重建大雄殿并建山門廊廡國朝僧永慈重修佛殿廊廡寮室

寶雲講寺

縣治西南行春坊東宋開寶元年建名傳教院太平興國七年賜額寶雲建炎嘉定燬重

建元至元二十六年至大二年又燬後至元間重建明洪武二十四年建方丈永樂十四年重建山門寺

與鄞學相隣弘治十三年有司徒寺於竹湖坊戒香尼寺遺址住持如璋重建殿宇方丈山門張邦奇爲之記爲天下講宗十刹之一舊寺基地入鄞學

白衣講寺

府治西北後唐長興元年建號淨居報仁院俗呼白衣觀音院清泰二年爲淨居續因祈

禱靈應加報仁二字宋治平元年賜白衣廣仁額建炎四年燬重建元至元十九年又燬復建明洪武三年圯其址改造本府廨宇徙府治西北普寧奉聖二尼寺廢址以建永樂五年佛殿圯重建九年建方丈廊廡十四年重建山門天順五年重建佛殿山門方丈嘉靖十九年圯二十一年住持清玻重修大殿山門方丈增置禪堂國朝重修殿宇并建關帝十王二殿

崇教教寺

府治西南舊名甲乙院唐乾符元年建宋大中祥符元年賜今額建炎間燬於兵紹興二

年重建元至元二十五年至大二年連燬延祐元年重建明永樂二年佛殿圯十三年重建嘉靖間復建

壽昌教寺

府治東南舊名西壽昌甲乙住持院宋乾道間建嘉定十三年燬元至元二十五年重建

大德元年西建淨土殿懺殿山門明洪武二十九年重修後圯宣德四年重建 國朝順治十年重建齋

堂關帝殿康熙十五年僧等雲重建山門十七年僧恩璿重修佛殿

天封謹寺

府治東南唐通天登封間建僧伽塔以鎮郡城漢乾祐三年始建天封塔院宋大中祥符

三年改今額建炎間燬紹興十四年郡守莫將重建嘉定十三年燬廢爲民居元至元二十三年復建泰

定三年塔圯至順元年重建後方國珍重修明永樂八年又重修十年雷火燬塔三層重修嘉靖三十六

年颶風大作塔頂崩墜三十八年郡守周希哲重修 國朝順治十六年重修雍正九年巡道孫詒知

府曹秉仁命監生信爾璣生員朱世燧住僧果心勸募重修

廣福禪寺

府西南握蘭橋西漢乾祐二年建號羅漢院宋太平興國十年賜今額後圯明宣德間重

建又圯成
化間復建

勅賜天童弘法禪寺

府東六十里太白山之東舊名天童山景德寺晉永康中師義興誅茅結

屋禪定於中時有童子日給薪水久而辭曰吾太
辰也上帝以師篤道行特遣侍左右語訖不見故稱
義興爲太白禪師唐開元中秘書齊萬融建多寶塔
宋淳熙五年孝宗賜書太白名山四字後燬元大德
三年重建賜名乾元寶閣明宣德三年又燬八年重
建萬曆十五年盡爲大水湮沒崇禎四年僧圓悟重
建國朝順治十六年圓悟弟子道忞應
內召因賜今名康熙十七年本哲建復古山門寺爲天

下禪宗五山
之第三山

育王禪寺

府東五十里阿育王山下舊名阿育王廣利寺晉義熙元年建梁武帝賜阿育王額宋大

中祥符元年賜名廣利大覺禪師懷璉居之興寧三
年建宸奎閣舍利殿內有釋迦如來真身舍利塔中

有一角金鐘舍利在焉高宗賜號曰佛頂光明之塔
常取至禁庭寺東北山上有佛跡循跡而上有東塔
院卽劉薩呵所禮舍利湧出之處西塔院寺西五十
步建於唐明皇時又有明月堂妙喜泉無相庵元至
正十年建承恩閣明永樂十四年佛殿圯復建
國朝康熙元年大殿災十三年建旧房五楹十九年
住持法鍾重修佛殿寺爲
天下禪宗五山之第五山

補陀禪寺

府東三里原係昌國東海梅岑山寶陀寺始
自唐大中間日本國僧慧諤自五臺山得觀

音瑞相欲返故國舟抵新螺礁諤禱之曰使我國衆
僧無緣見佛當從所向立精藍有頃舟行竟泊於潮
音洞下有居民張氏目覩斯異捨所居雙峰山卓菴
奉之俗呼爲不肯去觀音院宋元豐三年賜寶陀寺
額明洪武二十年因懸海徙附郡城於甬東栖心寺
內空址重建永樂二十二年建圓通寶殿宣德七年
建毘盧閣天順二年建藏經閣大悲彌陀殿及廊廡
嘉靖間建十王殿國朝復建方丈重修佛殿山門

及鐘樓

金峩禪寺

縣東南八十里梅溪里金峩山唐大曆元年建舊號羅漢院宋治平元年賜金峩山真相

寺額明洪武間廢宣德間重建成化間廢正德二年復建法堂後圯嘉靖二年改建升於山麓

海會禪寺

府西三里元延祐六年建名海會庵至正二年改爲寺明洪武二十三年重建千佛殿三

十一年復建舍利浮圖并塔殿永樂六年復建法堂元翰林學士袁桷爲記國朝順治間重修殿宇康熙十一年

重建山門

天井禪寺

府西南六十里宋建隆元年建始號天井院治平元年改賜天壽額明洪武初仍名天井

寺正統十年重修方丈景泰元年建山門重墾四天王像崇正間燬國朝僧鏡宗重建法堂并兩廊及

五芳龍

神祠宇

延福教寺

府東南二十里唐大中十三年建名天王院宋治平元年賜今額元至正間圯明景泰三

年重建方丈佛殿成化間燬嘉靖二十七年僧綱福愬重建隆慶初重修殿宇萬曆間建樓廊及修慧日

堂崇正十七年重修佛殿

資教講寺

府西三十里舊名廣德院周顯德元年建宋端拱元年重修治平元年賜今額明洪武二

年佛殿圯七年重建法堂方丈二十八年重建佛殿後圯景泰元年重建大殿修山門

聖壽教寺

府西南六十里唐咸通五年建宋太平興國三年賜額建炎年間燬於兵紹興間重建

西壽昌寺

府西三里篠牆北宋淳祐間僧慧通因在城壽昌寺燬徙建於此元至正二十五年復於

原基重建遺留本寺明永樂年間重修

布金講寺

府西南三十里宋寶元二年建治平二年賜額明天順六年重修佛殿八年建山門成化

元年重建西廊及裝塑四天王像嘉靖三十八年重修國朝程行祥捨田百畝永瞻寺內香火有碑記

妙智講寺

府西南七十里漢乾祐二年建宋治平元年尚書豐稷請爲功德院賜今額熙寧四年重

建佛殿後圯明

正統十年重修

寶積講寺

府西南七十里唐清泰元年建舊名總持院宋治平三年賜四明寶積額建炎間廢乾道

三年重建賜翠

巖山寶積額

四明講寺

府南二十里鄞塘鄉舊號鄞水院唐天復元年建以奉刺史黃晟香火宋大中祥符元年

賜今額後廢明

宣德間重建

寶華講寺

府東南六十里宋嘉定十三年建丞相史彌遠功德寺後廢明洪武間并人延慶寺天順

元年重建佛殿方丈及建莊於寶華橋傍

普光講寺

府南三十五里舊名光化寺晉開運元年建宋圯朝議陳允修重建明正統間重建方丈

天王敎寺

府西南五十里舊名晉寧院唐咸通十三年建宋大中祥符三年賜今額明宣德八年重

建山門天順七年建兩廊塑四天王像萬曆間重修

興敎敎寺

府西南五十里舊號小溪興福院唐咸通八年建宋治平元年賜今額明正統十年建山

門方丈廊廡塑四天王像國朝康熙間重建

隱學講寺

府東南四十里唐建中二年建號隱學宋大中祥符元年賜棲真額後仍名隱學元至正

二十五年圯明洪武十年重建永樂十四年又圯宣德八年重建佛殿方丈山門及四顧菴原有放生池蕩五百餘畝界立湖亭塔幢後萬曆年間遷寺於山旁

景德講寺

府西三十里宋寶祐元年建後圯明宣德間重建

方廣教寺

府西南二十五里舊名泗洲院唐咸通十一年建宋治平二年賜今額元至元十五年日

湖處士周塾捨田四百二十四畝乃於殿西別建祠堂以祀之立石紀其事後圯明正統年間重建佛殿

空相教寺

府西南七十里舊名四明保安院晉開運二年建宋治平二年賜今額紹興十二年重建

佛殿

南林教寺

府南三十五里元泰定四年建後廢明萬曆間重建

東林禪寺

府南三十五里唐天祐十年建宋治平二年賜圓通額後復今名明洪武三年燬宣德七

年重建法堂正統九年建佛殿

治平教寺

府東南三十里後唐清泰二年建名保豐宋治平元年賜今額明永樂七年圯天順間重

建嘉靖三十四年重修

月波講寺

府東五十里又名慈悲普濟寺宋淳熙五年建有月波樓越王史浩請額明洪武二十年

圯正統十四年重建歲久復圯國朝康熙間重建

明心教寺

府東南三十五里晉天福五年建名厲山院宋治平二年改賜今額明隆慶間重修殿宇

普安教寺

府南五十里梁乾化二年建名茅山院宋治平元年賜今額元至元十七年圯十九年重

建明永樂初重修正德十一年燬十五年重建嘉靖三十五年慈溪建城燬東臯寺住持清玻迎佛像更

置本寺整佛殿新建禪堂并廊廡山門

資壽禪寺

府東四十五里元至正間建久廢明天順五年重建嘉靖間復建佛殿方丈

阮山教寺

府東九十里舊名阮菴漢乾祐二年建宋熙寧間賜壽聖院額紹興三十二年改阮山廣

福寺額明洪武間圯嘉靖間重建

寺觀

資福敎寺

府西南三十里唐光啟二年建光化二年賜名廣學同光四年改名隱學宋咸平三年改

資福大中祥符元年改資壽後仍名資福元泰定間毀重建明洪武二十六年重修佛殿方丈及環翠樓

祥符敎寺

府東南八十六里晉天福間建久廢明天順間重建萬曆間重修

冲虛真觀

府治東南太和坊東唐天寶二年命天下皆置紫極宮以祀老子至梁改爲真聖觀宋祥

符間改天寶天禧紹定間毀重建元至元間改元妙後毀重建明永樂間圯宣德間重建山門丹房天順間鼎建真君殿三清殿夾廊二帶內立鐘鼓樓及方丈井亭山門立坊塑像七年奏賜今額今俱廢僅存元壇殿

佑聖觀

府治西北二里舊名佑聖道院元至治間建後廢明正統間欽差內官歐成重建真武殿玉皇

閣方丈廊廡國朝康熙三十三年提督馬三奇海關柏渡守張星耀令黃圖章重修玉皇閣四十二年

海關寶善重建真武殿邑人胡德邁有記四十八年
海關穆爾薩重建靈官殿五十八年鄧民何宗濂重
建迎真橋六十年同知趙永譽通判李尚德修葺廊
廡雍正四年章炳徐廷勳張思永范從誠陳兆申張
宗瀚等重修真武殿斗姥閣大士閣呂祖臺亭寧紹
台道孫詔捐俸新建佑聖山門供奉土府太歲神
蓬萊觀府西二十五里廣德湖之望春山先是白龍祠
側有道堂郡守樓昇生祠紹興十三年請象山
蓬萊廢觀額以名

雲濤觀府西南六十里它山堰傍宋嘉定十二年賜額遺德廟屬焉

報德觀府西北半里攸飛靈翼廟之右自宋淳祐八年
爲刺史黃晟築城功建屢圯明正德七年里人

倪淮
重建

至德觀府東三十五里
宋淳祐八年建